

April  
2016



Vol VII No. 2

# KRISTIAN THALAI

Kristian Thalai Páwl Chanchinbu thla tin chhuak



Synod Moderator



Exe. Secy. i/c KTP



Synod Secretary



Rev. Vanlalbela



T.Upa Dr. C. Lalhrekima



Rev. P.C. Lalropuia



Rev. J. Lalremsiama, CKTP Leader kal chhuak

## 56<sup>TH</sup> KTP GENERAL CONFERENCE





CKTP hruaitute (2014 – 2016)



CKTP hruaitute (2016 – 2018)

Not in the picture - N. La'fankimi



Ram pawñ aṭanga lo kalte puala Synod Moderator zanriah kiltute



Taiwan aṭanga lo kalte

**Kristian Ṭhalai Pawl chanchinbu thla tin chhuak****1970-a chhuah ṭan ■ Kum 46-naa vawi 4-na ■ Chhuah tawh zat : 450****Editor :**

Lalmuanpuia

**Joint Editors:**

C. Laldingliana

Upa K. Rorelkima

V. Lalrinmawia

Vanlalpeka

**Manager :**

R. Lalramnghaka

**A lak man :**

Kum khatah - Rs. 60.00

Copy khat - Rs. 5.00

*Thu chhuah tūr nei chuan Editor,  
Kristian Ṭhalai, Synod Office-ah thawn  
tūr a ni a; a la duh chuan KṬP Office-ah a  
man pèk lâwk a ngai.*

**Office Phone : 9436142398****E-Mail :**[kristianthalai@yahoo.com](mailto:kristianthalai@yahoo.com)[centralktp@gmail.com](mailto:centralktp@gmail.com)**KRISTIAN ṬHALAI PAWL****Thupui**

Rawngbawl tūra chhandam

**Thupui inngahna**

Ephesi 2:10 Thil ṭha ti atán  
Krista Isuaah chuan siama awmin,  
ama kutchhuak kan ni si a, chu thil  
ṭha tih chu kan awmna tūrin  
Pathianin a buatsaih lâwk a ni.

**Thil tumte**

1. Isua Krista rinna leh amah anna  
kawnga ṭhalaite hruai.
2. Kohhran kut ke ni tura ṭhalaite  
buatsaih.
3. Kohhran hnathawh tihpuitlin.
4. Krista Chanchin Ṭha puan  
darh.

**A CHHUNGA THU AWM**

- |   |    |
|---|----|
| 1. Editorial  | 2  |
| 2. K.T.P (Kristian Ṭhalai Pawl)- Kohhran kut ke                                       | 3  |
| 3. Malsawmna ni tura koh chhuahte nunchan ram<br>(Hringnun vui liamin dai ve rawh le) | 8  |
| 4. KṬP General Conference Vawi 56-na kha  | 11 |
| 5. Van KṬP Gen. Conference Palai  | 15 |
| 6. <b>Work Camp report :</b>  | 20 |
| New Sachan  |    |
| Manikbond   |    |
| 10. <b>Rimawi</b> - Zai mite hriat tur leh Pathian fakna hla<br>satute nihphung       | 23 |
| 11. <b>Kantu</b> - Vaivakawn Vengthlang Branch  | 26 |
| 12. Keimahni  | 28 |



## KEIMAHNI

Kum 2014-2016 chhunga Kristian Ṭhalai enkawltu (Editorial Board member) te hun a liam dawn ta a; thla leh (May 2016) aṭang chuan Editorial Board member tharten an enkawltawh ang. April 2016-ah hian copy 40600 chhut a ni a. A copy a pung zel a, member zat aṭanga chhut chuan tun aia hmasawh zel thei kan ni tih pawh a hriat a ni, ṭan la tlang zel ila. Thil dang chu eng pawh ni se, a latu (subscriber) kan pung zel hi hmasawonna chi khat chu a ni; kan lawm ṭheuh ngei ang.

Kan chanchinbuin hma a sawn zel hi kan duh ṭheuh awm e. Chanchinbu tihmasawntu, tiṭhatu, tingaihnawmtu chu a chhunga thu awmte hi a ni ṭhin. Thuziak ṭha, belhchian dawh. Mizo ṭawng hman dan thlenga theih chen chena uluk taka ziak thawh kawngah ṭan la tlang zel ila. Kohhran ṭhalaite chanchinbu a nih hre rengin, chuta chhuah awm chi ziak ṭhin ila; chutih rual chuan a chhiartu lamte pawhin keu liam mai mai lovin ngunthluk takin i chhiar chhuak dap ṭhin ang u.

Kristian Ṭhalai hi a ṭhan zel theih nan rawtna chi hrang hrang kan dawng a, tihpuitlin atana duhawm deuh deuh thurawh pawh kan dawng ṭhin. Editorial Board member-te pawhin tihhmasawh dan chi hrang hrang kan ngaihtuah ve ṭhin. A latu tam berte thlir rengin tuna a awm dan hi kan tlin tawh a ni rih a. Duhthusam tawh lohna lai tam tak in hmu ngei ang.

Kan chanchinbu hi tuna lak man kum khata ₹ 60/- kan pek hian thla tin bu khat hi ₹ 5/- in kan lei tihna a ni a. Kumin hian Synod Press lamin kan chanchinbu chhutna man hi an tihsan awangin Press aṭangin bu khat ₹ 5.15/- in kan khul chhuak ta a. A lakna man kan pek hi hmu kim vek pawh ni ila kan indaih tak loh awangin kum thar 2017 aṭang phei chuan a man pawh hi tihsan a ngaih hmeh hle a ni.

Eng pawh ni se, Kristian Ṭhalai hi hruaitu hmasate aṭang tawha Central KṬP-in thuziak hmanga rawngbawlna a lo kalpui kan chhunzawm tak zel a ni a. A hmasawh zelna kawngah tuna mite hian mawh kan phur a ni tih hriain thuziak thawh kawngah te, a man pek ṭhat kawngah te ṭan la ila. A buaipuituten ṭhahnemngai taka an tih zel theih nante kan ṭawngṭainaah i hre reng ang u.



## K.T.P (Kristian Thalai Pawl)- KOHHRAN KUT KE

— Upa K. Rorelkima,  
Ramhlun Venglai

**Ephesi 2:10** “*Thil tha ti atan Krista Isuaah chuan siama awmin Ama kut chhuak kan ni si a, chu thil tha tih chu kan awmna turin Pathianin a buatsaih lawk a ni*”.

KTP kan thil tum pali(4) te:-

1. Krista rinna leh Amah anna kawnga thalaite hruai.
2. Kohhran kutkê ni tura thalaite buatsaih.
3. Kohhran hnathawh tihputlin.
4. Krista Chanchin tha puandarh -tih a ni

### Kohhran chu eng nge ni?

Tawi tein han tar lang ila - Kohhran chu “Krista Thisen a tlan, mi thianghlim ho inpawl khawm’ a ni. Hei hian Kohhran chu ‘Pawl’ dang ang mai ni lovin ‘Ringtu, mipui in pawlho’ a ni tih a tilang a. Kohhran chu Pawl dang, Organisation pakhat ang mai emaw a ni ve lo tih a tichiang a ni.

Chu Kohhran ropui tak kutke ni tur chuan keini thalaite hi Lalpan min duh a ni.

1. Bible -a kan hmuh angin, Pathian hian a rawngbawl tur hian thalai, vanglai hun hmang mek te hi a mamawhin a duh bik em aw! a tih theih a.. Bible - a mi ropui, Lalpan a hman leh koh te hi thalai, tha chak, vanglai hun hmang mek an nih lai tak hian a ko deuh vek a ni. Pathianin, Evi leh Adama a siam laiin naute, pitar, putar ni lovin, thalai an nih hun tha tak angin a siam. Jacoba, Josefa, Mosia, Josua te pawh hi thalai an nih lai hunah chiah Pathian kohna an dawng. Israel ten Lal neih an rawt a, an dil angin Pathianin tlangval duhawm, duang tha tak mai Benjamin hnam Saula chu Lal turin a thlansak a. Lal Saula hnuah thalai sar veng vawng Davida chu Pathianin Lal turin a thlansak leh a ni. Daniela te thian za ho thalai hun an hman mek laia thih pawh hlau lo khawpa Pathian tan tlat ngam Daniela, Sadraka, Mesaka,

Abednegoa te chanchin ropui tak kan hmu bawk.

Thuthung Thar lamah chuan Chhandamtu Isua Krista pianna chu KṚP nula rual Mari leh Tlangval Josepha an ni tih kan hmu bawk. Kan rin Lal Isua pawh hi Tlangval tha chak lai tak mai kum 30 mi a nih chiahin Pathian kohna, tlanna rawngbawl hna a ṭan chiah a ni. Tirhkoh Paula chanchin kan hmuh hmasak berah chuan “Tlangval pakhat a hming Saula (Paula) tih kan hmu bawk.

Heng kan tar lan aṭang ringawt pawh hian Ṭhalai/Vanglai hun hmang mekte hi - Lalpan a rawngbawl tur in a duh a ni - tih a Chiang a ni.

2. Kristian Ṭhalai Pawl te hi Kohhran hlimthla ziaktute kan ni. Milem ziaktu chuan pencila wawi khat a thai hian a mitthlaah milem nalh tak a awm daih tawh ṭhin ang hian, Keini Ṭhalaite pawh hian Kohhran lem kan zia ka, kan nu leh pa, Kohhran hian beiseina sang tak nen Kohhran tana chhawnahawm ni turin nghakhlel takin min thlir reng a ni. Kohhran Inkhawmah hian Khuangpu hnung, Biak In tlar lai takah hian Ṭhalaite hi

rinawm taka dinhmun pawimawh tak chelhtu niin Inkhawm zai hruaitu ber kan ni. Kan awm loh chuan Inkhawm boruak leh zai a chhe vek a ni. Presbyterian Kohhran hi inkhawmpui hmanga Rorel Kohhran kan ni a. Inkhawmpui nikhuaah khawmpui hlawhtlinna tura mawhphurhna hna hrang hrangte hi ṭhalaite tel lo chuan a che thei lo a ni. Kohhran ropui leh ropui loh enna leh tehna lian tak pakhat chu Kohhran Zaipawl a ni. Kohhran Zaipawl member pakhat ni ve tura kan din hian Pathian leh a Kohhrana rawngbawl hna kan hlenna pawimawh tak a ni. Ṭhalai aw nalh leh fit tak mai, Lalpa faka theihtawp chhuaha zai hian thinlung a nghawr nghing a, Kohhran Thlarau nun a chawm hle a ni. Ṭan i la sauh sauh ang ang u.

Kohhran Activities hrang hrang, Kohhran Inkhawm chu sawi loha kan tih ngei ngei turah ngai ta ila. Kohhran hnatlang leh thil dangah te hian neitu chan chang kan nih angin kan inthlahdah thi ang lo a ni. Ṭhalaite zingah hian talent nei ṭha tak tak kan awm ṭeuh a, heng Malsawmna kan dawn te

hi Pathian ropui nan leh Kohhran ðhan zelna atan phal takin i hlan ang u.

KTP rual kan nih hun laia kan inhman zikluak ðhat ngat chuan Kohhran kalphung leh zia kan hria a, Kohhran hi kan hmangaih em em bawk a, Kohhran hruaitu atan pawh KTP- a chhum hmin hi an ðha ber a ni. Chutiang dinhmun pawimawh tak chelhtu chu Keini ho hi kan ni tih hre thar leh ang u.

3. Pathian leh a Kohhran huang chhungah himna leh himna tluantling a awm. Ziaktu ðhenkhat chuan kan ramah hian kum zabi danah harhna danglam leh tih dan dangdai deuh hi a thleng ziah ðhin, an ti. Tunlai khawvel kan hun tawn mekah pawh hian Kohhran pawn lam a ðangin zirtirna dangdai deuh leh ze danglam, nawi deuh te thlengin min nek neuh neuhtu an awm ðhin a, min la nek zel dawn pawh a ni thei. Cypriana chuan, “Kohhran pawnah Chhandamna a awm lo” a ti tawp mai. Tunlai kan Zoram khawvel hmasawna ðhan chak zia kan hria, thil hi a danglam dawrh dawrh mai a ni. Heng kan hmanraw

changkangte hi a ðha zawng leh ðangkai zawnga hmanga, kan ðhalaipuite zirtirtu tur chu keini KTP member-te hi kan ni tih hriat a ðul ta hle mai. Kristian ramah Pathian thu awih duh lo kan buaipui ðhin piah lamah kan la hriat ngai loh Pathian awm ring lo tih te hial ðhalai zingah kan awm ve ta emaw ni? Heng ngaih dan ðha lo leh rin dan piangsualte chhan chhuaka Pathian leh a Kohhrana hruai lut a, Kohhran tha tichak tur hian keini ðhalai, ngaihtuahna ðha zawk nei, a ngaihna hria, tunlai khawvel nun man phak te hi kan pawimawh ta hle mai. Kan thiamna leh finna, theihna te hi kan Lalpa leh a Kohhran tan, boral mek te chhan chhuak turin i pe zel ang u.

Kohhran hian kalphung mumal tak tihhlawhtlin zel tlak a nei a. Heng Kohhran hnathawh leh kalhmang tipuitling tur hian keini KTP te hi kan ding a ni tih hriat reng a ðul. Kohhran kutke ni tura buatsaih KTP te hi Kohhran hian min ringin min thlamuanpui a. Chuvang chuan KTP member-te hi Kohhran ke penna kawngpui pawn lama kal lovin, Kohhran avang leh Kohhran tana thawk tura Pawl

ropui tak ding kan ni tih hi hre reng ıla, KṚP member zawng zawngte hian Kohhran thil serh leh sang te hi ngaisangin, ngai pawimawhin ngai hlu thiam ıla. Kohhran thlen chin leh a hma lak mek dan te, a kal zel dan turte pawh ngaihvenin hriat ve ngei zel tum ıla. Chu chuan Kohhran hi a tizahawmin, a chawimawi ang a, ṭhang leh thar zelah Pathian leh a Kohhran hi a sawh nghet sauh sauh dawn a ni.

Kan hriat angin KṚP member nih hun chhung hi kum 14-40 inkar kum 26 chhung a ni a. Hemi hun chhung hi Pathian leh a Kohhran tana puitling leh ṭhang lian zel tura kan inzirna training-na hmun, training ground a ni. KṚP-a taima tak leh uluk taka nun leh hun hmang chho te hi chu nakin hnu zelah pawh Kohhran leh khawtlang tan ro an nih mai piah lamah ram leh hnam nghahfak, mi ṭangkai an ni ṭhin. Beiseina sang tak nen kan Kohhran nu leh pate hian min thlir reng a ni.

Chuvangin, KṚP -a ka hun hnunhngah hian ka member puite ka chah duh che u leh sawmna atan hman ka duh chu, mihring nun, hun tawnah hian KṚP nih hun chhung vanglai/

ṭhatlai hun hi kan hun hlimawm lai ber a ni. Vanglai hun hi a ṭha zawng/chhe zawnga thiltihtheihna nasa tak kan neih hun lai a ni bawk. Chhungkuaah pawh hian a chhunga ṭhalaite nun danin chu chhungkuaah chuan eng ang mite nge lo la cheng zel dawn tih a tar lang a. Hmanlai kan pi leh pute chuan mi khuaa an pem dawnin, chu khua chu pemna tlak a nih leh nih loh hriat nan chu khuaa ṭhalaite nungchang chu an va zir lawk ṭhin an ti. An khawlaia ṭhalaite nungchang an hmuh phat aṭangin chu khua chu pemna tlak a ni dawn nge dawn lo tih a Chiang ber ṭhin, an ti. Khawtlang zia pawh hi ṭhalaite kal khawm nungchangah a lang thei ber an ti. Kohhranah pawh hian ṭhalaite nun dan hian nghawng a nei nasa ber a. John Wesley-a phei chuan ṭhalai 100 min pe ula, ka duh ang takin ka enkawl ang a, khawvel hi ka chawk danglam vek thei ang a ti. Hei hian khawvelah hian ṭhalaite kan pawimawhzia a tilang Chiang hle mai. Sam 127:4-ah chuan “Mi chakin a kutah thal a ken chuan tu mahin an cho lo va, thiltihtheihna nasa tak a nei a ni” a ti. Tu mahin an cho ngam



loh leh thiltitheihna nasa tak, chak tak neitu chu tu dang ni lovin keini thalaite hi kan ni, tih hre thar leh ang u.

Tunlai kan ram dinhmunah ngei pawh hian a chiang a ni. Kum 2013 aṅanga in tan tawh, HARHNA duhawm tak chuan kan ram leh hnam, Kohhran hrang hrangte Pathian khawngaihna vangin vawiin thlengin min la chiah hneh hle mai. Ram chhung leh pawn aṅangin he harhna chhim hian Kelkang khaw lamah kan liam ruih ruih mai a nih kha. Kan ramin harhna nasa tak vawiin thlenga kan chanah pawh hian, mite mit fukrawn leh thlirrawn (FOCUS Group) te chu keini thalaite hi kan ni. Thalaite thlen chin a hriata, an hlimna leh lawmna, Thlarau Thianghlim hnathawh avangin Kohhran programme nghet tak, hman aṅanga vawiin thlenga danglam thei lo hial khawpa kan

ngaih kalphung mumal tak kan neih, kan Kohhran programme siam lawk te pawh kan tidanglam dawrh dawrh mai a ni. Thlarau thianghlim hnathawh avangin zan tin Kohhran inkhawm kan nei tluan parh thin tih te, zan tin lengkhawm thin a, au rual thin/bingbilet thin tih te, a dang pawh sawi tur a tam awm e. Kohhran min chiah hneh hle a, a lawmawm thlawt a ni. Khawvelah hian THALAITE hi kan va pawimawh tak em! Chu dinhmun chu tunah khan iluah meka ni.

Chuvangin, Kristian Thalai Pawlte hian kan thiltum leh inngahna te hre reng in, Lalpa leh a Kohhran tan thahnemngai taka thawka, hma lam pana tan la zual sauh sauh tur leh Kohhran kutke kan nih zel theih nan Lalpan a thu te kan zaa tan Mal min sawmsak rawh se theuh rawh se. Amen.

—  KRISTIAN THALAI  —

### SAWMNA

**R**eini Zemabawk Branch KṪP chuan May 2-8, 2016 chhung hian kan Branch kum 60 (Diamond Jubilee) tlin lawmna hun kan nei dawn a. He hun min hman pui tur hian Zemabawk Branch KṪP hruaitu lo ni tawh leh lo awm tawh zawng zawngte kan sawm a che u.

Vanlalchhuanga Kawlni  
Information Secretary, Zemabawk Branch KṪP

## Malsawmna ni tura koh chhuahte nunchan ram (Hringnun vuilliamin dai ve rawh le)

— Lalremruata Ralte  
Karmel Br., Darlawn.

St. Francis chuan hetiang hian ṭawngṭaina thu lungkuai leh dawn tisei tak mai chu a lo phuah chhuak a, "Lalpa, muanna hmanruaah min hmang la, huatna hmunah hmangaihna, rinhlelhna hmunah rinna, beidawanna hmunah beiseina, thimna hmunah enna, lungngaihna hmunah hlimna thlentuah min hmang ang che" tiin. He ṭawngṭaina thu laipui khaikhawmna chu 'Mi dangte tana malsawmna nih' hi a ni. Chu nihna chu ringtute nihna, khawvela koh leh dah kan nih chhan pawimawh ber chu a ni. Chu malsawmna nihna chu Pathianin min koh leh hunna hmun apianga luan chhuahpui tur kan ni. Mahse, chu nihna ropuizia leh a man pek ngaih nasat lawi si ziate erawh hmuh hmaihin kan thlir kan a. Mahni duh dan leh ngaih danin he

'Malsawmna ni tura koh chhuahte nunchan ram' hi kan ar khaw thim dai leh fo ṭhin.

Pathian mi hman, mi dangte tan malsawmna ni tura koh chhuahte nunchan ram hi khawvel mite thlirna tlang aṭang pheichuan awhawm loh tak, thil atthlak ni mai awma mawi, tuarna leh channa hlira khat emaw tih palh awl tak a ni a. Sum leh pai, in leh lo, chung leh khat, ṭhen leh rual thlakhlelhawm tak takte kalsanin, mahni nun nen lam vuilliam a, a kotu duh zawng ang zawka nun leh hun hman ngaih tak tlat zawk si na hmun a ni. Chumi hmun varpawhtute nunah chuan huho nun hlimawm tak kha thlaler nunah hruai luh a ni a, lalna leh thuneihnate pawh tlawmna leh thuhnuairawlhna saiiip puan sintir a ni fo ṭhin.

He hmun hi khawvel mite mita hmuhsitawm leh hnuaihning berte ropuina hmun a ni a, an ropuina erawh chu lei lam tehfunga teh chhuah mi a ni si lo. Chhiahhlawh tlawm takin huaisen taka a pu a hmachhawn a ngaihna hmun,

cheksawlh leh diriamna tinreng karah pawh Beram, a hmul mettu hmaa ngawi renga a awm anga thiam thu sawi thian lohna hmun kha a ni tlat si a.

Chutianga malsawmna ni tura kohte nunah chuan duh dan, ngaih dan leh tum dan ram chu thiah a ni a, 'Kei kei' ti thin khan 'Nang zawk le' tih a lo tul tawh a, mahni hrehawm pawisa lova ni tin a thlan loh Kraws put a lo ngai tawh zawk thin. Kan ril rem loh zawng leh kan tum loh ram ni mahse, Tirhkoh Paula dungthula taia min hrengtu pawhna lam zawk a nih miau avangin, mathei lovin chu kawng chu kan nunin a chhui zel a lo ngai tawh zawk thin.

Chu kawng zawhtute chu lei Lalpuan sinin, Lal inah piang lo mahse chung lam mitah chuan mi lian leh mi ropui an ni a. Mite hmelhriat chakawm ni turin hming hmahruai leh hnuadalah nihna ropui leh phawkphawhraw tar chhuah tur nei lem lo mahse, anmahnia awm chu 'Krista' a nih miau avangin an thu leh hlain bengkhawn a hlawh chawk. Sitting room banga 'Isua zara

kan ta' tih intarna pucca building chhawng hnuaiah ar bawp keih pha ve lo mahse, 'Ka tawrh hi Lalpan a phal, vui thei ka ni lo' tiin thlarau zalenna run, rap in, chhawlbuk hnuaiah lungrual takin tukzan an chhiar a, thin thi diaiin an zal thin. Channa ruamah pawh an hloh chu hlepah chhiarin 'Nakina kan Lallukhum timawitu a la ni dawn si a' tiin an nunah lawmna luipui an la luanthir thei a, mite angin silhfen chhuak thar, tlereuh man tam leh khawvel changkanna hmanga intih vai tingtangna tur nei lem lo mahse an thinlung chu 'Lei lawmna aia lawmna ropui, van lawmnaa' chhun khah a ni fo thin.

A nei faten 'Tunlai dan alawm' tia thawh loh hlawh la a, sawrkar sum mahni pawisa ip a an hai luh tun tun lai pawhin, malsawmna ni tura kohte erawh chuan Josepha kam liam hawhin, "Engtin nge he سوالlian tak hi Pathian mit hmuhah ka tih ngam ang?" tiin tunlai lo leh thing nih pawh an hlawh ngam tlat thin. Huho nun hlimawmin an rilru sukthlek a tibuai ve lo a, thawh thut phur tharnain an rinna thla a tizawp ve ngai hek lo. Chung lam duh dan a nih

chuan a hniak tlem lam zawhin thangthar Daniela nih pawh an ngam sak ñhin.

He malsawmna ni tura koh chhuahte nunchan ram hian tuarna leh channa kawngpui a pawh a, chu kawng chu sawia fiah ni lovin, chana fiah mi a ni. Chu hmun zawh tura kohte chu tuar tur leh chan tura koh an nih angin a ñul chuan an chan ang a, an tuarin nat pawh an na ngei baw ang. Mahse, chu an nat leh tawrhna, an retheih leh ralna erawh chuan mi dangte hnenah damna leh hahchawlhna a thlen zel dawn a ni. Tuarna leh channa ruamah ringtu nun chu a duah ñha ñhin a, kohhran nun a duhawm a, a chawr no a, a ñhangin rah ñha a chhuah ñhin. Tuar tur leh chan tur awm lohna kohhran leh ringtu mi mal nunah chuan, inthlahdahna te, hmasawn lohna te, inlungrual lohna te, kal hranna leh awm hranna te a thlen thuai a, Kohhran nun leh ringtu mi mal nunin par a chhuang tak tak thei ngai lo.

Aw le, a tawp berah chuan ti te mai hian kan thu ñang i han kawm dawn teh ang. He kawng hi a hniaka kan zuina tura

entawn tur min hnutchhiahtu, Krista kan rinna siamtu leh tifamkimtu kawng lo zawh tawh, malsawmna ni tura koh chhuahte nunchan ram, tuar zela hnehna chang tura koh hrante kalkawng kha a nih miau avangin tih namai a ni lo va, kawng awlsam lah a ni nahek lo. Kan Mizo thawnthu pakhat a, 'Ka pu Vawm Vawma tui a nih kha, i dawt ngam leh dawt la; i bual ngam leh bual rawh'. Tih hmun nen khan chhulkhat chhuak an nih loh vek pawhin an inhnaih viau ta ve ang. Eng le khaw le, 'Rawngbawl tura chhandam' tih changchawi a, 'Krista leh amah anna kawnga ñhalaite hruai' tih Sahuai thing vawn tlattu Zoram Kristian ñhalaite hian he malsawmna ni tura koh chhuahte nunchan ram hi hringnun vui liamin kan dai ve ngam dawn em le?

*Mualphona lam ñhuampui saw van pasalthate kawng a ni,  
Nuam tur a nih ring lo la, mahni ralna hmun a ni;  
Chawimawina au thawm rehin lawmtu hmel a bo tawh ang,  
Anchhe dawng mihring fapa kawng zawh a ni e;  
Hringnun vui liamin dai ve rawh le.*



## KṚP General Conference Vawi 56-na kha

— V. Lalrinmawia

*CKṚP 2014-16 Committee member*

**M**arch 3 – 6, 2016 chhunga New Champhai Field-a KṚP General Conference vawi 56-na kan hman kha KṚP member ni chhunga General Conference ka tel theih hnuhnung ber a lo ni ve ta reng mai! Lunglen thu leh hun kan lo hman tawh ṭhin lamte sawi lovin tun ṭum KṚP General Conference kan hman tak kha i han thlir let thuak thuak teh ang.

### A thlengtu lam

Champhai khua hian tun ṭum bak hi ṭum thum KṚP General Conference an lo thleng reng tawh mai -

- i) KṚP General Conference vawi 21-na, Champhai Kahrawt-ah February 20 - 23, 1975 chhungin.
- ii) KṚP General Conference vawi 32-na, Champhai Vengthlangah February 20 - 23, 1986 chhungin.
- iii) KṚP General Conference vawi 47-na, Champhaiah February 15 - 18, 2001 chhungin.

June 29, 2013-ah Organising Committee din a ni a, Septem-

ber 21, 2013-ah Organising Committee hi tilianin Pastor Bial pasarih (7) - Champhai Vengthlang Bial, Champhai Kahrawt Bial, Ruantlang Bial, Champhai Bethel Bial, Champhai Vengsang Bial, Champhai Kanan Bial leh Champhai Zote Bial te an tel. Conference an thlen tûr hi ṭhalaite inhmuhkhawmna satliah a ni lo tih an hriat avangin Joint KṚP huam chhunga Kohhranhoten theihtawp tak meuh an chhuah a. Inkhawmpui thleng tur chuan tha leh zung mai bakah sum a lo ngai a, chungte chu kum hnih leh a chanve bawr hun an neihah hian an thawk chhuak thei a ni. An budget ₹ 70,42,000/- hi a tam kan ti viau mai thei. Heti zawng hian i han chhût chhin teh ang - palai 18,000 bawr vel anga chhûtin Inkhawmpui zan li chhung hian palai pakhat zel atan ₹ 391.22 vel seng ang an ni a, chu chu zan khatah ₹ 97.80 ang vel a ni. Heti zawnga ngaihtuah hian cheng nuai 70 hi a lo tam lutuk lo ve.

Sub-Committee hrang hrangin an mawhphurhna an hneh hle mai. Pandalawmna hi khaw chhung laili a nih loh avangin chet vel a rang zung zung thei lo tih lohah chuan duhthusama hmun rem tha leh zau a ni a, nawm pawh a nuam nangiang mai. Sub-Committee hrang hrangte chet velna han chhui zau deuh a chakawm hle na a, hmun a tlem deuh bawka sawi tam lo mai ila. Lalpa hminga kal khawmte inhawng tak, thatho leh nelawm taka an buaipuina kawngah fak an phu vek e.

Palaite inhuam taka thlengtu chhungkua zawng zawngte kha fak hmaih an hlauhawm hle mai. "Champhai hi an changkang, mikhual min thleng thiam tak zet," tih tawngkam hi palaite ațangin kan dawng hnem hle mai.

### Conference chhimtu

Tun tum General Conference-ah hian ram chhung leh pawn ațangin chhimtu, khual tha kan nei nual. Wales ațangin Rev Anuerin Owen (Zolawma) KŦP dinna kawnga sulsutu Rev. OW Owen-a fapa leh *Cfl Choir*, Presbyterian Church in Taiwan (PCT) ațangin mi paruk (6), South Asia Christian Youth Network (SACYN) ațangin pakhat,

PYJC Phai Synod Myanmar ațangin mi pakhat, North East India Christian Council Youth Assembly (NEICCYA) ațangin mi pahnih, Presbyterian Youth Fellowship (PYF) ațangin mi pakhat an lo tel. Heng khual tha kan neihte hian kan Conference programme nuam an tiin an haw thleng pawhin an hrill fak a la ni zel.

### Report leh a chheh vel

March 3, 2015 (Ningani) zanah ***Palai lawm leh Report Inkhawm*** a ni a, hmasawmna kawng hrang hrangin a hmuh theih. KŦP Inkhawmah hma kan sawn hret, 24.13% inkhawm thin ang kan ni a, hei ai hian hma kan sawn theih a rinawm. Sum thawh chhuah lamah hma kan sawn zel laiin inneihna chungchangah erawh tan lak a la ngai viau mai, Biak In aia hmun danga innei kan la tam zawk cheu mai, KŦP member-ten hei hi chonaah ngaiin tan i la zel ang u.

Ram chhung leh Mizoram pawn lamahte Bial leh Branch kan nei a, Report lut tlai leh lut lo bial, tlem kan la awm thin a, hei hian Secretary-te leh Office lam report siam kawngah a ti tawanfum thin tlat. Report a hun taka theh luh kawngah hmasawn kan la mamawh

bawk. Kum thar lamah chuan Bial tin aţangin a hun takah report theh lut turin hma i sawn ang aw.

### Conference Programme lam

A tlangpuia thlirin Conference programme a hlawhtling. Ram chhungah hei aia programme lian ţhalai fuankhawmna a awm lo, hei vang hian hun pawh Inkhawm pangngai ai chuan a rei lo thei lo.

Conference thupui **Pathian Kohhran**, Rev. Vanlalbela, Speaker hnen aţangin sermon ţum thum kan ngaihtla a, tun dinhmuna kan ramin a buaipui leh mamawh tak thupui kan ngaihtla hi a vanneihthlak tak zet. *Kohhran kutke* ni tura inbuatsaih m k leh *Kohhran hnathawh tipuitling* tura tha thawh t r ţhalaiten he thupui hi kan ţangkaipui ngei ang.

T. Upa Dr. C. Lalhrekima hnen aţanga **Rilru hrisel** kan ngaihtlak kha ţhalaiten tan a hlu tak zet. Khawvel ţhang zel leh hmasawmna kawng hrang hrang awmah hian ţhalaiten *Rilru hrisel* tak neiin kan lo hmachhawn thiam phah ngei angle.

**Ramthar hawi programme-**  
a Rev. PC Lalpuia, Kolkata

hnen aţanga kan thu ngaihtlakthe mawlh kha. *Krista Chanchin Tha* puan darh kawnga hma la m k K P member tan chuan chakna hnar a ni chiang ngei mai. Zaikhawmpui mawlh kha, a tel theite kan vannei.

Inkhawm apiangin Pathian faka zai a nuam em em zel mai. Zai hruaitu, musician leh hla hriltute inpekna a fakawm. Inbuatsaihna hi 2015 October thla tawp lam aţang khan ngawrh taka kalpui a ni a, an inpekna a hluin Conference hlawhtlinna kawnga hmanraw pawimawh tak an ni.

Inrinni zan Inkhawm ban *Fakna Inkhawm* pawh a hahdamin, hlim taka Pathian fakna hun kan hmang te kha a va hlu em! Praise Group lamin tih tak zeta an inbuatsaihna a hunah Pathianin mal a sawm. Anni pawh hi 2015 October thla tawp lam aţanga inbuatsaihna kalpui tawh an ni.

Zaipawl hrang hrangte zai a ngaihnaawm viau zel a, Zaipawl rawngbawlna lamah hmasawn zel erawh kan mamawh tlang viau. Wales zaipawl ţha *Cf1 Choir* an lo tel thei kha a lawmawm tak zet. *World class* zaipawl zai ngaihtlak theihna remchang kan neih bakah Zaipawl zai chungchangah pawh hlawkna kan hmu ngei ang.

*Fellowship* leh *Variety Programme*-ah te Item hmuhnawm leh ngaihawm tak tak mi mal leh Bial hrang hrang aʔangin kan ngaihlain kan thlir ho a. Hun kan nei tam lo nen, duhthusam lo deuh kan nei ta mai ang em aw? a tih theih. Drama leh *plays* lamah kan changkang viau, a thawnthu leh *script* lamah erawh hmasawmna tur a awm zel ang. Hun lo kal zel turah chuan kan hun chep dante ngaihtuah a, inbuatsaih kan thiam zel a ʔha àwm e.

Sound system lam sawi kai ang. *Active Sound* lamin KṚP rawngbawl na atana an lo in phal ʔhin tawh angin tun ʔumah pawh hian an hmanraw thar leh an neih ʔhat ber ber nen Champhai lamah hian an rawn thawk chho a. Pandal hi kum dang zawng aia a zau avangin eng ang takin sound hi ri ang maw? tih chu kan lo ngaihtuah hlawn a nih kha. An theihtawp an chhuah baw k a, Conference chung zawngin Sound ʔha tak mai, khaih lak awm hauh lovin kan nei thei a, lawmawm tak a ni.

### Rorel lam

Champhai Vengthlang Kohhran Biak Inah Rorel Inkhawm a awm a, palaiten rorel kan thiam hle. Mak deuh

mai chu inchhiarnaah khan Bial 197 awmah Bial aiawh palai 202 kan ni tlat, a ding lo tur ding palh kan awm nge, a chhiartu lamin an chhiar soal palh. Thil thleng danglam tak a ni ve hrim hrim e. Kan rorelte rawngbawl na hawi vek a ni baw k a, thu inchuh leh inhnial a awm hauh lo, kan ngaih dante tlang tak leh fiah takin kan sawi mai a, rorel a hahdam. ‘Lalpa leh keinin’ tih angin ʔawng taina nena rorel a ni tih hriain Bial leh Branch tinten a tih hlawn thlinna kawngah theihtawp i chhuah ang u.

### Ṛipna

A bul ʔan zan aʔanga a tawp thlenga Pathian min hruaina a ropui tak zet. Tun ʔum Conference-ah hian item langsar, hla sak lar bik, thu sawi sawi chhawn hlawn bik awm hauh lovin kan tuan, a ropui ber Pathian a langsar ber. Hei hian kan Inkhawmpui a tihlu a, kan rawngbawl zelna kawngah pawh Lalpa langsar ber zel se. A ʔha lam leh lawmawm lam kan sawi a, sawi kim loh a awm ʔeuh ang, duhthusam lo leh fel hlawn deuh pawh a awm ngei ang, khawvel a la ni miau a. KṚP General Conference vawi 57-na suangtuaha eng ang takin nge kan hman leh ang tia thlir chungin kan inʔhen ta hlawn a nih kha. [www.mizoramynod.org](http://www.mizoramynod.org)



## VAN KṚP GEN. CONFERENCE PALAI

— P.C. Vanneia,  
Chhingchhip



**KṚP** inhung bikna pal Kum 40 nek puar pawp pawp chungin, khaw nge, kumin chu 'KṚP Gen. Conference-a ka hun tawp tak tak a nih ve dawn tak hi' tiin neih zawng zawng fun puar chhuakin Champhai lama pheh chho ve tur chuan ka inbuatsaih sauh sauh a. Mite chu an nupuiten emaw, an chhungten emaw an thawmhnaw ken tur te an siam sak mawlh mawlh laiin; kei ve, val siniar upa lam; dawn thui ta lua chuan inrem fel tik ka nei thei lo. "Hei hi ka mawipui ang em, hei hi ha ila mi'n smart min ti ang em" tih lam ai mahin, Champhai hi a vawt viau ang em; nge, a lum tawh viau' tih te ngaihtuah pah chuan parawl chawfun tiat lek lek chuan ka thawmhnaw chu ka thlep hrang thluah a. Kutdawh ipte puar ang maiin, a chang leh ka rem fel a, a chang leh ka hai chhuak leh a. Zawng awm tia lek mut bu nen chuan ka inkhai chhuak ve ta a.

Ni dang leh kum dangah chuan phur leh hlim takin ka feh chhuak ve thin a. Kumin zet zawng, Lota nupui ang maiin hnung lam ka thlir kir a, kan hun liam tawh hnu te thlir kirin za lo zetin ka nui huk huk a. Hma lam hun tawi te ka la neih ve chhun chuan min tihlim zo ta meuh lo e. Naupang zawk hlim bengchheng karah chuan ha na ang maiin ka indawm kun run a. Rei lo teah Seling khua kan thleng a, chhim leh hmar, chhak leh thlang aṅanga Krista avanga Ṭhalai a kan rawngbawlpuite nen Van Lal ruai chawh lui kil za tur chuan, kan inzui chho ta tluk tluk a.

### **Khiangawi zamual a liam em ni?**

Tluang taka tlanin Khawzawlkhua chu kan thleng ta hlawl a, kawng tam zawk chu kan tum bun ta. He khuaah hian rei lo te chawlh paha khua han fan vel chu ka duh a. A chhan

chu ka lung a leng miao a ni. Hmanah chuan he khuaah hian chhai lai 'd' ka tawng ve a. Chung ho nena KṚP Gen. Conference hlim taka kan hman ho lai te ka ngaihtuah let a, chung lam rau ni lo, tisa lunglenna thlarau chuan min tham a. A hun lai mil zela lunglenna thawngaleivir chuan min sep kang hliau hliau a ni ber. Kawng sir tuaka tuahpui leh vau lo vul chi chia te chuan thinlai mu hnu a kai tho a. Mahni tawka vanglai tha mar zual laia tum tawk 'd' te nena Conference Hla Bu phena inmitsir ralh paha, "Hla mawi ropui ber, van hla thar mawi chu; sain an zai van Angel zawng zawng nen" tia Pandal-a kan zai ho ve bawbawk lai te chu a lo lang thar leh uar uar a. Tunah chuan anni pawh pasal fanaute nen chhangchhe bakberhin an inhnuk hnawk ve tawh ngei ang a, khang hun lai KṚP nun kha an chhui let ve ngai a nih chuan; Vanglai nun ngaiin an tap ve chek ang.

Palai tlan liam zung zung leh hlim au thawm ri teng tung karah chuan thil tam tak ka lo ngaihtuah a. Nakin lawka KṚP

hun bi thliahin, an duh emaw duh lo emaw a la um chhuah ve tur ngaihtuah lo leka hlimte chu hmuhnawm thlir tak chuan ka thlir a. Hmeichhia ngat phei chu pasal chhia tha hmu se an hun tha a tawp nghal vawng vawng lah a ni ber. Chu hun chu kan la tawng vek dawn a, Vanglai nun ngaia tah vawng vawng ni a lo her chhuah meuh chuan, KṚP kan lo mangtha tan dawn tawh chu niin. Rilruin la chakin zuam viau mahse, thenkhatin kutzungtang thliak meuhin kan kum an lo chhiar an lo chhiar tawh a. Zawi zawia insaseng zai kan rel ni chuan, vawi khat tal hnukulh teuh chu kan hmabak ta a nih hi.

### **Khawvelah hian Mikhual ka ni...**

Rei lo teah chuan a hmun Champhai khawpui chu kan thleng ta. Kan tum ram thleng ve ta chengin, mikhual kan nih mai zia a lo lang chiang nghal a. Mikhual hmuaktute an felin an zei em em a. Mikhual hmuahna hmun Counter-ah khan thlen nghal mai chakawm khawpin min lo dawngsawng thiam. Chutah leh, min hruai diah diah a, kan thlen in tur theuhah min

han dah a, mikhual kan nihna a lang tulh tulh. Duhsakna chi hrang hrang min hlui mahse, chu chuan min ti inthlahrung tulh tulh a. Eng ang pawhin han che vel buan buan mah ila, mikhual zak thei lo nih bak kan hlawh zo lo. Chaw ei khama puar thu report ziah ngai leh, kan neih ve chhun Bag hai hai a ngai ringawt mai pawh khan kan dinhmun chu a tichiang reng.

Chuti a nih mek laiin Pandal lam ka zuk thlen thlak nak chuan, palai tam takten, khawvel nun vui liama 'Beramno, an tana tuar hnu; zaia an lo awi vut vut mai' han hmuh chuan rilru a kehsawm lo thei lo. Chatuan ram tling lo hring nun vui liama, an mikhualna ram khawvel aṅanga Van Kohhran ho nen thlarau hmuh khata cheng za ang maiin lam ze tin an lo thai a. Thlarau mit aṅanga ka thlir chuan, Beramno Lalthutthlenga ṭhu, hmangaihtu Isua chu lam hual mup mupin, lei rimawileh Van rimawite chu a lo inchhawn ut ut hian ka hria. Josefa'n a lei mawina silhfen a mualphopui anga, mite mit hmuha mawina

reng reng zawng lova ṭhalai rual an nghin dul dul lai khan, Van mipui pawh khi an awm mai mai theih ka ring bik lo. An zingah khan Pu Jephtha fanu te, Tv. Timothea te, Tv. Daniela te ṭhian pathumte hmeh pawh hmuh ve mai ka lo inbeisei hial a. 'Champhaiah hian Mikhual ka ni, tih aiah; Khawvelah hian mikhual ka ni' tia lei lam thlir lova Van lam thlira lam kal vut vut chuan min hneh mang e.

### **Ka Bialnu ka ti bo...**

Val tar lam tawh pawhin suihlung dumtu leh beiseina nung nena hma lam thlirpui chu kan la nei ve fan a. Remchanna lei hram tumin Conference-a inhmuh chu kan rilru ve ran a. An sawi Zawlkhawpui ni kang per aṅanga nula pakhat lo kal ve nen chuan SMS hmangin chanchin chu kan inhrilh ve zel a. Bus an chuan aṅanga a luak chhhuah zia te, an thleng thui deuhva a luak tak ṭeuh thu te, kawng lakah eng mah a ei theih loh thu leh a chauh thu te chu rei tak chu min hrilh a. Kan thleng hnai telh telh a, Signallah chhe tulh tulh, a hmunah pheichuan 'Not reachable' a ti ta zuap zuap. Chhei raw, engtin

tak chuan kan ti dawn chu ni maw... Mite chu Pandalkiangah an inzui tak del del a, kei lah chu Lawi pa duap ang maiin ka vak tak ruk ruk si. Khang zawng zawng zinga mi pakhat zawn chu thil vang a tling. Hmana kan chhungte boral tawh kha zawng zawk ila hmuh a awl zawk phian awm e.

Chutia zawn neia ka melh kual rulh rulh lai chuan, Pandalchhung lamah chuan, "Van hmun ropui hmangaih ram khi, mi thianghlimte In a ni" tih hla chu sain an lo lam dup dup a. "Anni hnena cheng ve turin khawvel thilte chu paih la" tih an sak chuan min deng dawp dawp mai. Ka suangtuahna mitthlaah chuan van kawthlera Krista hmangaihtute inkhawmpui angin min thlirtir a. Chung zingah chuan ka hmangaih chu ka lo zawng a, 'Ka zawng ruai a ka tawng si lo' tih ang khan; hmuh tur reng reng a lo awm lo. Ka ngaihtuahna chu a vak vela. He inkhawmpui chhimtu tam takte hi Van hmunah khian kan kim ngut ang emaw chu.. A thente hi chuan khawvel thilte paih miah lova inkhawmpui nawmna huhang

chhima vak vel mai mai kan tam si a tiin, 'ka bialnu ka ti bo' ang leka hmuh zawh loh tur hi a awm theih awm mang e.

### Sap nge nge an lo ngo e....

Khaw nge, chuti fakaua lam hla, tuipui ral atang meuha inkhawmpui chhima lo kalte chu chibai i buk ve reng reng teh ang tiin Inrinni zan inkhawm ban chuan Pandal hnung lamah lo chang vein ka lo nui hni ve vur vur a. Saw le, an lo chhuak ta. A lo chhuak hmasa apiangte chu ka lo Zawng hnah nem ban ve hmiah hmiah a. A tlar tawp lama an Sap Pavalai rual ho nen chuan indin chilh meuhin titina hun tha kan nei ta hlauh a. An fa hrin Zoram thalai min hmuh dan ropuizia te, nuam an tihzia te, thlarau thianghlim hnathawh makzia an hmuh thu te chu sawiin tawng an inchuh mar mar a. Khaw nge, thla i la ho ve teh ang tiin; an zingah chuan Dumka bel kawt ang maiin ka lansarh tak chu.. 'Sap nge nge an lo ngo e'...

Mi ngo kara ka din zuah lai chuan, thil tam tak ka tawn chuan ngaihtuahna chi hrang hrang min siam a. Inkhawmpui

hmangtu mipui thahnem tak chu mi inang lo fe fe kan lo ni a. A then kal awt awt te, a then 'tu nge ka nau vel' ti ni awm taka awm pho ula kal teng teng te, a then te lem kawngchhak hal tum ang maia nger lam nei deuh te, a then mawi inti hliah hliah hmel te, a then Confi - loh hmel tak te, a then lah an inneih ni emaw tia lo inpenparh hle te, hmai mam thel leh arngeng ngah deuh te, mawng chhing leh mawng fual te, mawng dep leh mawng poh deuhte pawh; A ni, chung zingah chuan thatna bik sawi tur leh hmel hmaiah pawh chapopui tur bik ka nei lo tih ka inhria a. Ni e, pawn lam lan dan hian min thliar a, ramri min khamsak chu a nih ber si hi. Mahse, he pawn lam lan dan, vun rawng leh hmelhmang inan lohna hi eng tikah emaw chuan van taksain kan la thlak anga. Chu hmuna ka chan ropui turzia ka ngaihtuah a, Sap ho ai maha ngo a, beramno thisena min han su fai tur te, lei silhfen hlipa van thuama min han thuam hun turte ka ngaihtuah chuan, ka lo inthlahrunna leh inkiltawihna zawng zawng chu dah thain Lamtuala lam

haih haih mai chu ka tan khan a lo tawk ber chu niin.

### **A tlang ka kawm dawn e.**

He lei dan inkhawmpui hi chu a hautak em mai ti raw. Inngaiin intawk khawm thin mah ila 'mangtha aw' tia inthen a tul leh si a. Khualzin leh mi cham mai nih nak laiin mikhualah bawkan tan a tul thin baw. Tapin lungduh kan inthen a, inhmuh leh kan beisei tawh miah lohte zun leng ngaiin kan rum a nih hi. Nakinah khawpui mawiah hmangaihtu Krista Chairman-na hnuaiah Gen. Conference tak tak chu kan la chhim za dawn a. Beramno thisena insu faite chu palai ruatte kan ni ve tawh ang. Kan conference zin kawng hautak tak mai chanchin te chu a kiangah kan la report ve ang a. Kan thlan bal leh vaivut kai te chu min hruk hulsak tawh ang. Mahse, chu inkhawmpuia tel tur chuan palai chu an thlang uluk viau dawn a nih hmel. Kraws ram reh paltlanga, ni tin mahni nun vui liam ngamte chu thlen In ruat sa an ni e. *'Van KTP Gen. Conference Palaite kan lo kawm a che u'*

*KTP i chhuahsan hnuaiah pawh Kristian Thalai tan hian inthlahrung hauh lova thuziak rawn thawh zel turin kan sawm a che. Ed.*

## WorkCamp Report :

### New Sachan

**Z**anhril Pastor Bial K.T.P te chuan kum 2009 Bial K.T.P. Conference-in Kum 2015-a Work Camp neih a lo rel angin kum tin Budget-ah sum dahin kan inkhawol chho bek bek a. Bial K.T.P. Committee-in ngun taka a ngaihtuaha a rel hnuin October 27 - 31, 2015 khan Marpara Ramthar Biala New Sachan khuaah Eoangelist Teacher chenna tur In sain mi 27, mipa 20 leh hmeichhia 7 kan zuk kal a.

October 27 (Thawhlehni) zing dar 5:30-ah Bus-a chhuakin tlai lam dar 3:30-ah tluang takin Marpara Ramthar Bial Pastor Quarters kan thleng a, he lai hmuna thawktuten min lo hmuakin min lo lawm thiam hle. Kan thlen hun hi Marparaa Mizote leh Chakmate intihbuai boruak sosan lai tak a ni nain Pathian venna avangin eng mah harsatna tawh lovin Lawng (Marboat) in New Sachan khua kan pan nghal a. Lawngah darkar hnih dawn Mar lui leh Khawthlang Tuipui zawh thlain khaw thim hnuah kan tum ram New Sachan hi kan thleng ta a. Kan thlen zan hian New Sachan khuaa kan thawktuten zanriah tuihnai tak min lo buatsaisak a, kan hlim tlang hle.

A tuk October 28 zing Varŕian aŕangin Ban phunin bul kan ŕan a, khaw thim thlengin a tuk lamah pawh nileng leh zan thlengin kan thawk zui a. Member kalte ŕahnem kan ngai

tlangin tu mah zelthel leh tih tur hrilh ngai awm hauh lovin mahni phak tawkah kan ŕang tlang hle. A ni thumna October 30 chhun a lo nih meuh chuan kan in sak pawh luah theihin kan peih fel ta der mai. Harsatna karah pawh Pathianin min veng a, khu lai hmuna thawktute leh kan ringtupuiten min ŕawiaawm ŕha a, hlim taka hna ŕul ang ang kan han thawk ho theite kha a ropui hle a ni. Nilai Zan Inkhawm pawimawh tak thawktute leh kan ringtharte nen kan hmang hoin Rawngbawlna Report tlangpuite kan ngaiŕhla a, a hlawkthlak hle.

October ni 30 (Zirtawpni) tlai lamah a tuka haw turin New Sachan aŕang hian Marpara kan pan chho leh a, Zirtawp zan hi Marpara khawper Tiperasora-ah kan Bial aŕanga Missionary-a chhuak NI. Zairentluangi inah zanriah eiin kan riak a, a tuk October 31 (Inrinni) zingah Aizaw lam panin kan chhuak leh ta a. Tluang taka kalin zan Dar 7:00 velah mahni in ŕheuh kan thleng leh ta a ni.

Pathian kaihhruaina leh Bial chhung Kohhran hote ŕawngŕaina avangin Workcamp tluang takin kan nei thei a, khu lai hmunah thawh tur tam tak zinga pakhat thawk ve theia kan awm avangin kan lawm hle a ni. New Sachan khuaah hian In 200 velah Ringtu chhungkaw 25 awrh awmin mihring 900 chuang zingah kan Kohhran Member 120 vel an awm mek a, ringthar kan neih belh zel theih nan leh thawktute tan i ŕawngŕai zel ang u.

— **Lalrosanga Pachuau**

## Manikbond

### **Work Camp kan neih chhan :**

Kum 2015 Bial KṚP Conference rorelin "Bial KṚP huapin Work Camp neih ni rawh se" tih a pass chu Bial KṚP Committee-in a tihhlawhtlin dan a ngaihtuah a, Work Camp neihna hmun tur te uluk takin zawh a nih hnuah, Manikbond Mission Compound, Karimganj District, Assam chu a remchan avangin thlan a ni ta a ni. Kan Missionary Pastor te leh Synod Mission Board hotute nen inbe felin kan thawh turte ṭha taka ruahman a lo ni ta a ni.

### **Manikbond lamtluang zawhin :**

November ni 19, 2015 (Ningani) zing dar 6:50-ah Bial ṭhuthmun Hmarveng aṭangin Pastor C. Lalchhuanawma'n ṭawngtaiin min thlah a. Bus pakhatin Bial chhung KṚP member 32 kan kal thei a, kan Work Camp hi Upa Laldingliana, Bial Chairman (Saidan Kohhran Upa) in min ho thei a, kan lawm hle a ni. Kawng laka kan rilṭam loh nan tiin Chaw kan fun a, Bairabi - Kanhmun road-a kal tum kan ni a, mahse kawng a chhiat bakah Tlawngah kan kai theih loh avangin a kual zawngin kan kal a ngai ta a, Israel faten Kanan an panna kawngah a kual zawnga an kalte kha kan inchan deuh rum rum a.

Tichuan, Bairabi pelh Assam ram chinah tuihmun ṭhatna laiah tukṭhuan kan ei a. Kan tum ram lam chu kan pan ding leh ta char char a, Patharkandi-ah Work Camp chhunga kan ei leh in turte lam khatoma kan Bazaar hnuah Manikbond lam chu

kan pan leh ta ngat ngat a. Tlema kan tawt deuh avangin ṭhut hmun rem fuh leh fuh loh kar a hla deuh tih loh chu nuam takin kan insawh dial dial a. Manikbond hmun hi zan dar 7:30 velah kan thleng a. Tu mah kal tawh kan la awm loh avangin Mobile GPS kan hmang ṭangkai hle. Hemi hmunah hian Manikbond Kohhranten zanriah min lo buatsaihsak a, rin loh takin Vawksa chhum ngei mai min lo hmehpui a, Manikbond Kohhran chungah kan lawmna chu kan dul khan a sawi Chiang hle awm e. Zanriah kan ei kham meuh chuan mut a lo hun a, Kohhran hovin kan thlenna tur an lo siam fel sa diam a, Compound-a Missionary leh thawktute inah kan thleng darh a, tui taka muin zan hun chu kan hmang ral thei a ni.

### **Kan kal chhan ..etc.:**

Zirtawpni zing khua a lo var a, tukṭhuan ei khamah kan hna chu kan ṭan ta char char a, an Biak In kawt sir ko chu laiin, hei hi fur laiin a min ṭhin avangin Biak In kawt a rawn tihkawok ṭhin a, chu chu zau deuh takin kan lai a, a thlang lam phaizawlah chuan leivung chu kan paih a, nilengin Kristian Ṭhalai nula leh tlangvalten hah pawh sawi lovin kan thawk matop matop a, nuam kan tiin kan hlim tlang hle a ni.

A tuk Inrinniah zingkar aṭanga thawk ṭanin chawhnu herah chuan kan thawh tur angte chu kan thawk zo thei a ni. Hetia a tam zawkin lei an lo lai hian, Mission Compound Brick-a an hungna te chu a ṭhenin rawng an lo hnawih baw a, tlema kut themthiam leh thluak fim deuhten Signboard lo

ziak in, Gate chungah "Synod Mission Compound, Manikbond, Karimganj Dist., Assam" tih chu mawoi tak maiin an lo ziaak barok a ni. Compound-a thawktute inpekna a fakawm a, kan hah hlauin min pui ve reng barok a ni.

Kan thlen zan tih loh chu keimahniiin eirawng kan inbawol a, compound-ah bukte nuam tak mai chu Choka atan kan hmang a, kan Cook te inpekna azarah KFC ang maia tui kan ei thei reng kha a lawmawm hle.

### **Kan Inkhawm :**

Inrinni zan hi a ram mite Bazaar hun a nih awangin Kohhran inkhawm an nei lo va, zirtawp zanah an inkhawm hlauh thung a. Zirtawp zan Kohhran Inkhawmah Kolasib Hmarveng Bial KTP Secretary-in thu -sawiiin, Pathianni chawhma Sunday School-ah Pu R. Zonunmawia, Kolasib Hmarveng Bial KTP Leader-in Zirlai a khaikhawm a, Pathianni zanah Upa Laldingliana, kan Bial Chairman-in thu a sawi barok a ni.

### **Manikbond Pastor Bial dinhmun :**

Manikbond Pastor Bialah hian Kohhran puitling 4 leh Branch Church 5 a awm a, Kohhran ding hmasa ber chu Jugicherra niin 1981 khan a lo ding tawh a, Bial hmung putu Manikbond Kohhran hi 2001 khan a ding ve chauh a ni. Bial chhungah hian thawktu : Pastor Vanlalliana Sonset, Bialtu Pastor, Pro Pastor Lalngaihawma, Evangelist 12 (Mi mal chawm 1) Nurse 2, Craft Teacher 1 leh Kross Sipai 2 an awm a ni. Manikbond Bial hi Chorei leh Ranglong hnam an ni deuh ber a, Bru tlem an awm barok. Bial chhungah hian Kohhran Upa 6, T/Upa 11 awmin

Kohhran member zawng zawng hi 728 niin Dan zawh kim 398 an ni a, chhungkua 148 an awm.

Ṭawngṭaipuina tur tam tak an nei a, thawktute pawm min chah nasat ber chu anmahni ṭawngṭaipui piah lamah kan Mizo hnahtlak zinga mite Hindu sakhua biao, Inthawoi ṭhin an la awm khu hmalakna lian tak pakhat a nih awangin ṭawngṭaipui reng turin min chah lawm lawm a ni.

### **Mahni in lam panin :**

Work Camp kan neih chhung hi November 19 - 22, 2015 chhung a ni a. Work Camp hlawhtling tak kan nei thei hi Pathian min hruaina vang chauh a ni. Kan hnathawh leh kan thil tihte chhuan tham eng mah awm lo mah se, keimahni tawkah chuan ṭha kan tiin lawmawm kan ti hle a ni.

November ni 23, 2015 (Thawṭanni) zing dar 6:30-ah Compound atangin mahni ram lam pan turin kan chhuak a, Khawchhak mi fingte ang deuh khan kan kal lama kawngah haw tawh lovin kawng dangah kalin, haw lam kan ni barok a kan hmanhmatoh oak lo barok nen zan dar 6:30 Phaisen-ah lutin Mizoram chu kan rawn chuang chhuak leh a, Zan Dar 8:00 bawr velah Kolasib Hmarveng kan thleng a ni.

Min hruaitu leh min awmpuitu Pathian hnenah lawm thu kan sawi a. Theih tawka Pathian rawng kan bawol vena min phurpuia, tluang taka hun kan hman theih nana min ṭawngṭaipuitu zawng zawngte hnenah lawm thu kan sawi barok a ni.

— **F.Zothankima, Secretary,  
Kolasib Hmarveng Bial KTP**



RIMAWI ■■■

## Zai mite hriat tur leh Pathian fakna hla satute nihphung

— Upa Zothanmawia,  
Khatla

**Thuhma :** Thupui pawimawh tak sawi ve tura Central K.Ṭ.P hruaituten min sawm hi lawmawm ka ti hle mai. An mi sawmna hi hlu leh pawimawh ka tih em avangin ka tlintawk lohna lam dahṭha a, theihtawp chhuahin he thupui sawi/ziak tur hian ka inbuatsaih ve ta a ni. Phuai lai zawng awm mahse kan mamawh tlan tur thil engemaw tal chu kan chhar ṭheuh ka beisei. Chipchiar tak ziah vek dawn chuan a thui lutuk dawn a, point hrang hrangah ṭhensawmin, a ṭul ang zelin kan sawi zau mai dawn nia.

### I. Rimawi bul ṭhut thil pali

1. **Rhythm :** Ri inkarthlak, ri chak, muang leh zawiin a siam hi tiin Music Dictionary - Darchhawna chuan a hrilhfiha. Mi vantlangin rimawi kan tuipuina chhan ber pakhat chu a rhythm vang hi a ni hial awm e. Hnam tin mai hian hmanlai aṭangin ri inkarthlak dan phung

mumal tak hi kan nei ṭheuh mai. Hla vuakzat hian hla ran zawng a hril lova, hla nihphung (drum beat) a siam zawk. Hla ruangam kan duanin kan ngaipawimawh hmasakber tur chu rhythm hi a ni.

Barpui leh barte-ah bass drum; colon-ah snare drum ti ri zel ta ila, hla thluk kan hriat hmam hla kalphung tur ruangam chu kan hre hmasa thei dawn a ni. Hei hian rimawi kan tum/kan sak paha kan taksa chet vel dan a hril tel bawk avangin a pawimawh hle. Rimawi rem a lam dan chi hrang kan hriat tam loh vang nge, lam dan phung kan tuipui zawng a tlem vang zawk - puipun nikhua, sakuana thil emaw hnam thil emaw hlimhlawp zawng pawhin rimawi rem a kan lam dan leh kan lam rem rimawi, hla chu a nihphung a inang deuh vek mai ! Rhythm hian kan taksa chet a thunun a, rhythm rau chang tawk vel pawh a awm theih vangin kan hriatchian a ṭul hle,

2. **Melody :** Ri khat tuangtlam taka ri kal zel, hla thluk kengtu ber (Music Dictionary - Darchhawna) tiin a sawi theih. Hla thluk (melody) chuan kan rilru sukthlek lam a keng tel tam zawk. Hla thu awmze nei leh zual a rawn phochhuaktu chu a thluk hi a ni, phurawm emaw lungkuai

zawngin emaw kan her rem thin. Hla thluk hian hnam zia leh khawsak dan thui tak a keng tel zel niin mi thiamte chuan an ngai. Hla mawi kan tihna chhan ber pakhat chu a thluk mawi kan tih vang a ni fo. Hla thluk inrel dan hi kawng tam tak a awm a, hlawm lian deuhah chuan Major leh minor-ah a then phawk theih ang. Major leh minor chhungah hian a thensawmna chi hrang hrang a la awm leh a. Chu chu kan luh chhuah tul chang a awm fo. Heng pentatonic, blues, harmonic minor, melodic minor, dorian, phrygian, lydian, Mixolydian leh a dangte hi kan hman thiam chuan hla thuin thuk zawk leh awmze nei zawkin a ngaihlata a luhchilh thei a ni.

3. **Harmony** : Ri chi hrang hrang awm khawm ti pawhin kan sawi thei ang chu. Hla kalphung (rhythm) leh hla thluk (melody) mawi leh zual a rik theihna chhan chu rimawi hmanraw chi dang nena inchawih taka a rik hian a ni. Rimawi hmanrua kan tumna leh mi dang nena kan zai honaah a tangkai hle. Hla phuah hi pianpui thiamna atangin a awm thei a, ri chi hrang remkhawm (harmonise) erawh hi chu a zira zir ngai a ni ber zawk. Hla nihphung tha, thluk mawi tak pawh hi a lo pawlhtu ri

dang vangin a nihphung a hloh daih thei. Ri chi hrang infin khawm dan (chord proggesion) hi kan hriat tam zawh poh leh kan hla hlutna a thuk zual ang.

4. **Tone Colour** : Kan sawi tak pathum rhythm, melody leh harmony kan chawhpawlh chhoh dan sawina a ni ber. Hnam zia (culture) leh zai leh lam hian inzawmna thui tak a nei. Mihring nihphung changkan leh kan loh, ngaihtuahna ril leh ril loh thlengin hla kan chei dan chuan a tar lang thin. Rimawi kalphung thensawmna hrang hrang Rock, Ballad, Country, Hip Hop, Blues leh a dangte awmze nei taka rem chhuak tur chuan - (lemziaktu in pencil-in milem mawi tak a ziak a, rawnga a chei dan a zirin a mawina a belhchhahin a paih bo thei ang hian) - tone colour hian kan rimawi tihchhuah tur pawh hi ri chi hrang kan chawhpawlh dan a zirin a mawina a tidanglam thin.

II. **Hla phuahtu** : Rimawi leh a kaihhnawih thilah chuan hla phuahtute hi an pawimawh ber hial awm e. An tel lo chuan zaimite leh rimawi tumtute hlutna hi a tlahniam ngei ang. Zofate pawh hla lamah kan intodelh ta hle mai. Puipun nikhuaah pawh mahni

ṭawng ngeia hla ngaihthlak tur ṭha tak tak min hluitu an ni. Hla ṭha, kil tin aṭanga nek dawl tak, a thu, a thluk leh rimawi kal danah pawh zir chian dawl tak kan nei ta nual mai, a lawmawm hle. Hla kan phuah, a thu lehlin, thu awm sa hrula phuah rem, thluk awm sa rin, a enga pawh chu ni se chiang taka a siamtu hming leh ṭul dang tar lan tur a ni, a hnua hla inchuh a awm loh nan. Hla kan phuah hian rimawi remkhawmtu (Composer) kan la kai pha mai lo va, hla ziaktu (Song writer) kan la ni chauh zawk, music-a rem dan tur zawng zawng (Instrument chi kim) kan ziah chhuaha kan phuah theih hunah chauh rimawi rem khawmtu (Composer) intih ṭhin tur a ni. Chuti lo chu hnam dangin min nuihzat palh ang e.

Hla phuah tuten kan hriat tur tlem a zawng han tar lang ila :

1) Hla kan phuahin ruangam (rhythm, melody) fel takin kan siam hmasa tur a ni.

2) Kan hla thu leh a thluk a inmil tur a ni (kan ṭawng thluk mila hla thluk rem, lungngaihna - muang leh fan railh, lawmna - rang leh phurawm).

3) A thu a Pathian thu em? Thurin kalh zawng thu kan zep palh em?

4) Keyboard style (ballad, country, rock, jazz, gospel etc.) hi hla kalphung leh a thluk zawn kual nan chuan a ṭangkai hle.

5) A theih hram chuan ṭawng tuang pangngai aiin hla thu a tam theiangber hman/chher tum tur a ni.

6) Hla thupui hi mi rilru lakna awlsam tak a nih ve avangin, uluk taka ngaih tua h tur a ni.

7) Hla phuah thiamin solfa an thiam vek lo a, solfa thiam pawhin hla an phuah thiam kher lo. Kan hla phuah erawh a thu leh a thluk ziakin dah ṭha thei ila, a duhawm hle.

8) Hla phuah tu chuan musical instrument pakhat tal tum thiam se, a hla phuahin awmze thuk zawk a paw chhuak thei ngei ang.

9) Hla thu ṭha tak ziak chhuak thiamte hian a thluk kan siam thiam kher ṭhin loh avangin mi dangte nena thawh ho thiam a ṭul.

10) Kan hla phuah chu a ṭul phawt chuan siam ṭhat leh kan hreh tur a ni lo. Hla ṭha kan tih hi mipui hriata sak chhuah tawh hnua siam ṭhat leh te pawh a awm ve bawka nia.



# KANTU

Vaivakawn Vengthlang Br.

**V**aivakawn Vengthlang Branch KṚP hi August 1, 2012- a Vaivakawn Kohhran aṭanga Vaivakawn Vengthlang Kohhran a indan rualin din ve nghal a ni a. A din tirh hian KṚP member 141 (mipa 75 leh hmeichhia 66) an ni a, kuminah hian member 212 (mipa 127 leh hmeichhia 85) an ni. Branch Committee member hi 23 an awm meka, thla tin zirtawpni zan vawi hnihnaah Branch Committee neih ṭhin a ni a. A din tirh aṭangin Office Bearer 7 an awm tawh bawk.

Branch tihchak nan Bible-a Zawneite hming chawiin Isaia leh Jeremia Group-ah te inṭhen a ni a. Kuminah Group-ten Budget atan Rs. 8,000/- neiin budget hi half yearly (kum khatah vawi hnih) in an pe ṭhin a, group-te hian Kohhran huam chhungah bial insemn Tui leh Electric bill khawn chu sum hnar nghetah an nei a, B.P. check, lehkha chhe hralh, lehkhabu kawm siam leh a remchan dan anga inhlawhin sum an tuak ṭhin bawk. Thawhṭanni

zan, Pathianni chhun ṭawngṭai inkhawm, Nilaini leh Inrinni zan inkhawmte, hla zir leh Branch hnatlangah te group inchhiarna neih ṭhin a ni.

Branch hnuaiah hian Sub-Committee hrang hrang sawm-Programme, Finance, Zaipawl, Evangelism Cell, Property, Refreshment, Decoration, Reception & Ushering, Archives leh Peniel Editorial Board- te din a ni. Evangelism Cell hmalaknain thla tin Pathianni hmasa ber tlaiah chaw ngheia ṭawngṭai, member tlawh chhuah, feh chhuah, hnehna kawng zawh leh bethel- te neih ṭhin a ni a. Tin, thla tin inrinni zan remchangah Branch Committee-ten inhlan tharna hun an hmanṅ ṭhin bawk. Kohhran Zaipawlten Kohhran Programme pawimawhah ṭha takin hla an rem thei a, kum 2015- khan Music Video hmasa ber 'Chawlhna ram' an siam a. Kohhran Male Voice ṭha tak din a ni bawk.

Tunah hian Synod Mission Board hnuaiah Missionary pathum

chawmin an member pahnih Synod Mission Board hnuaiiah Misionary-in an chhuak meka, an member pathumten (B.D, Hindi B.D & B. Miss) an zir mek bawk. Kum 2013 aṅangin Kohhran Chanchinbu KṚP enkawl 'Peniel' chu kar tin khaih lak lovin chhuah ṭhin a ni a, Kristian Ṭhalai Chanchinbu copy 100 an la mek bawk.

Thawhṭanni zanah hian Sermon, Rilru sawi, Bible chhiar rual, Ṭawngṭai rual leh KṚP kum puan thupui zir inkhawmtein hun an hman ṭhin a. Tin, member thar lawmna leh Group hruaitu thlan, Group Nite, Praise & Worship, Member inkhawm kim, Sport, Zaipawl Nite, Advance Krismas, Krismas Carol leh Member Bible chhiar chhuak lawmman pekte hi kum tina an hun hman ṭhin dan a ni. Pathianni Sunday School inkhawm banah Ṭawngṭai inkhawm an nei ṭhin a, hetah hian ṭawngṭai rual bakah Sharing, Hla zir leh Hla duh zawng thlan, Review Programme leh Solfa zir tein hun an hman ṭhin bawk.

Kumin chhung hian Work Camp, Branch Nite, Evangelical Nite, Conductors Training, Rammut Bethel, Literature Nite etc. te neih an tum a. Mi harsate pualin

thawhṭanni zan inkhawm apiangin bawm dawh ṭhin niin hei hi kum tawpah hlan ṭhin a ni. Kum 2015-a an inkhawm percentage chu 29.18% a ni.

Inkhawm thawhlawm, Faith Promise leh Group budget- te hi an sum hmuhna tlangpui a ni a. Thla tin Thawhṭanni zanah Faith Promise luh dan Report ngaihthlak ṭhin a ni bawk. Blanket suk, dawr bungraw thiarte chu an sum hmuhna pawimawh tak a ni bawk. Kum 2015 chhunga an sum thawh chhuah zawng zawng chu Rs 3,42,245/- a ni a, Branch Project a an nei Sound System Rs 2,10,000/- man chu nikum khan an lei bawk.

An member Biak In hawnga nupui/pasal nei an awmin lawmpuina thuziak (citation) leh Holy Bible an pe ṭhin a, an member missionary-a chhuak an awmin ngaihhraina Rs. 2,000/- leh Holy Bible an pe ṭhin bawk. An Kohhran mi thi an awmin Pathianni zingkar hun remchangah inkhawmpuina an nei ṭhin a, an member thi an awmin ralna hun hman leh ral nan Rs. 1,000/- man hu pek ṭhin a ni bawk.

Central leh Bial KṚP aṅanga tih tur awmte ṭha takin an tihlawhtling ṭhin bawk.

# Keimahni



■ **KHAWRUHLIAN BIAL** : February 21-23, 2016 Khawruhlian Bial Conference hmanpuiin T.Upa Tv. R. Lalramnghaka (Fin. Secy.) leh Pu Ngruhmingliana te an kal a. February 21 (Pathianni) zan Fellowship-ah Pu Ngruhminglianan thu tawi a sawi a, February 22 diamond jubilee lawmna chawhma inkhawmah T.Upa Lalramnghakan thuchah a sawi bawk. Chawhnu inkhawmah Pu Ngruhminglianan diamond jubilee souvenir a tlangzarh a, jubilee ruai theh a ni.

■ **CHANVO NEITU HLANNA**: February 23 (Thawhlejni) zana Channari Kohhran Hall-ah General Conference-a chanvo nei turte hlanna inkhawm buatsaih a ni a. Asst. Leader Pu Samuel Laldinglianan a kaihruai a, Gen. Secretary Upa Zonunmawian inbuatsaihna report tlangpui pein inhmelhriattirna a nei a. Synod Moderator Rev. H. Lalrinmawian chanvo nei turte tawngtaian a hlan a, Leader Rev. J. Lalremsiaman thuchah sawiin KTP T-shirt a tlangzarh bawk. Inhlanna neih zawhah Zai Hruai Sub-Committee Chairman Dr. Lalliansanga kaihhruiain Zai hruai leh Praise Group-ten hla an zir zui a, a tawpah tawngtai rualna hun hman a ni.

■ **TAIWAN DELEGATES PUAL PROGRAMME**: Taiwan atanga General Conference hmang tura lo kalte pualin February 29 (Thawhtan) zana KTP, Electric Veng Branch leh CKTP Committee-te buatsaihin Electric Veng Kohhran Hall-ah programme hman a ni. Anni hian Mizoram KTP Inkhawm chhim ngei an duh avangin February 26-ah Aizawl an lo thleng tawh a, Electric Veng Branch-in programme tha tak leh cultural items tha tak an lo buatsaihsak thei hi a lawmawm hle.

■ **GENERAL CONFERENCE 2016**: KTP General Conference vawi 56-na chu New Champhai Field-ah March 3-6, 2016 chhung khan tuang taka neih a ni a. March 3, 2016 (Ningani) zana tanin Palai Lawmna leh Reports ngaihthlak nan hun hman a ni. Synod Executive Secretary i/c KTP Rev. B. Sangthangan KTP Kum Puan (2016-'17) kaihhruiaina booklet leh kum puan behchhana KTP, Chhinga Veng Branch ten film an buatsaih, "Lungloh Tui" chu Pathian hnenah hlanin a tlangzarh a. Synod

Secretary (Sr.) Upa H. Ronghakan, Mizoram Synod Choir (2014-2016) music video album, "Lal A Ni" tih chu Pathian hnenah hlanin a tlangzarh bawk. March 4 (Zirtawpni)-ah Champhai Vengthlang Kohhran Biak Inah Synod Moderator Rev. H. Lalrinmawia hruaiin CKTP hruaitu thar (2016-2018) thlanna neih a ni.

Inthlanna neih zawhah Leader Rev. J. Lalremsiama kaihhruaiin rorel ñan a ni a. Rorelnaa palai 1,037 kan ni.

**Mikual leh Lirthei:** Reception Sub-Committee lamin mikhual thlen dan leh lirthei an chhinchhiah chu hetiang a ni:

1. Mikhual zawng zawng - 18,635
2. Langa kal - 1,000 vel
3. Motor kal dan - Bus - 310, Sumo - 482, Two wheeler - 630, Car - 453, Pick-up - 200, 407 Truck - 59, LPK - 11, TOTAL - 2,145

**Fraternal Delegates:** General Conference-ah hian Presbyterian Church of Wales (PCW) a ñangin Rev. Aneurin Owen (Zolawma) a lo kal a, ani hian CF1 Choir (member 18) a rawn hruai a, Presbyterian Church in Taiwan Youth (PCTY) a ñangin mi 6, South Asia Christian Youth Network (SACYN) aiawhin 1, Presbyterian Youth Joint Conference, Phai Synod (Myanmar) aiawh mi 3, North East India Christian Council Youth Assembly (NEICCYA) aiawh mi 1, Presbyterian Youth Fellowship (PYF) aiawh mi 1 an rawn intir thei bawk. PCW mikhual Mizorama an cham chhunga ATC Bus hman min phalsak avangin kan lawm a, mikhualte buaipui tura kan ngenten min tihhlawhtlinsak avangin lawm thu kan sawi bawk a ni.

**Hun hman dan tlangpui:** Pathian Biak Inkhawm ñum 5 neih a ni a, Speaker Rev. Vanlalbelan ñum 3 hun a hmang a, Synod Moderator leh CKTP Leader-in thu an sawi bawk. Heng bakah hian Rev. P.C. Lalropuia (Ramthar lam hawi prog.), Rev. Lalparchhuana (Zaikhawmpui prog.), Dr. Lalliansanga (Asst.Secy), Upa K. Rorelkima (Com. member) te hnen a ñangin thuchah tawi ngaihthlak a ni a, Pathianni zan Fellowship inkhawmah Leader thar Rev. Zothansanga hnen a ñangin thuchah tawi ngaihthlak a ni bawk. Rorel hlanin pandal-ah Ramthar hawi programme leh Zaikhawmpui hun hman a ni a, Thuzir inkhawm ñum 1 (Rilru Hrisel - TUpa Dr. C. Lalhrekima), Variety programme ñum 1, Fakna inkhawm ñum 1 leh Fellowship inkhawm ñum 2 neih a ni. Thuchah ngaihthlakte a ña hlawm hle a, chanvo hrang hrang nei tura ruatten an chanvo ña takin an hlen chhuak thei vek bawk a, a lawmawm hle.

■ **MODERATOR DINNER:** March 8, 2016 (Thawhleh) zanah Synod Conference Centre-ah Synod Moderator-in ram pawn a ñanga lo kalte

pualin zanriah a buatsaihsak a, inthlahna inkhawm hman zui nghal a ni. Inthlahna inkhawm hi Gen. Secretary Upa Zonunmawian a kaihruai a, Leader Rev. J. Lalremsiaman hunserh hmangin Synod Moderator Rev. H. Lalrinmawia leh Senior Executive Secretary Rev. Lalramliana Pachuau ten thu tawi an sawi a, Taiwan delegates, CF1 Choir, Mizoram Synod Choir leh Armed Veng South Cultural Club ten items tha tak an nei a. Asst. Leader Pu Samuel Laldinglianawm thu leh inthlahna thu a sawi a, Leader thar Rev. Zothansangan malsawmnain inkhawm a tin a. Inkhawm banah hian Mizoram Synod Choir leh CF1 ten Choir Cabinah hla an record ho bawk.

■ **GENERAL CONFERENCE PANDAL TLU:** March 11, 2016 (Zirtawpni) khan General Conference hmanna pandal chu a thiah hnatlang an kalpui mek laiin a thlusaawp a. Pandal thlusaawp a delh Tv. Vanmawia (k.48) chuan a nunna a chan a, hliam 6 an awm bawk. Hemi thu hriat veleh Synod hotute leh CKTP hotute inrawnin, CKTP hruaitu a remchang ang ang a hmuna han kala han endik ni se, an ti a. CKTP Committee atangin Gen. Secretary Upa Zonunmawia, Asst. Leader Pu Samuel Laldinglianawm, Upa Rorelkima, Pu Ngurhminglianawm, Pu Zonunsanga Ralte, Pu C. Laldinglianawm leh Pu K. Lalruatpuia te an kal a. March 12, dar 11:30 a.m.-a Tv. Vanmawia vuinaah Gen. Secretary-in Synod leh CKTP aiawhin thu a sawi a, Synod Moderator-in tuarpuina thuziak a thawn chu Kanan Bialtu Pastor hnenah a hlan a, chhiar chhuah a ni. Synod ralna Rs. 20,000/-, Central KTP hminga ralna Rs. 10,000/-, Territorial Salvation Army Youth leh Central South Division Salvation Army Youth ten CKTP kaltlanga mitthi ralna an pek Rs. 5,000/- ve ve leh Branch leh Bialhrang hrang atanga ralna an thawn Rs. 55,000/- chu Asst. Leader Pu Samuel Laldinglianawm mitthi chhungte hnenah a hlan a. Mitthi vui zawh hian hliam tuarte kan kual an ni a, CKTP hmingin Rs. 1,000/- diat diat dam lo kanna pek a ni a, tawngtaina hun hman zel a ni bawk. CKTP hruaitute leh Gen. Conference Organising Committee member-ten chhiat tawhna hmun pandal an en ho nghal bawk.

■ **TV. VANMAWIA RALNA:** General Conference pandal chima vanduinawm tawh Tv. Vanmawia ralna, March 14-22, 2016 chhunga CKTP Office-a kan dawn zawng zawng chu Rs. 69,760/- a ni a, hliam tuarte tanpuina Rs. 11,000, Organising Committee tanpuina Rs. 1,000/-, a vaiin Rs. 81,760/- a ni.

■ **YRC SOCIETY REGISTRATION:** KTP Youth Recreation Centre Society Registration chu Mizoram Societies Registration Act, 2005 (Act No. 13 of 2005) hnuaiah tihfel a ni tawh a, registration number - **MSR 710 of 17.2.2016** pek kan ni.



■ **INNEI:** March 17, 2016 khan CKTP Committee member Dr. Lalrotluanga leh Nl. Rebecca Lalrotluangi, Ramhlun North te chu Luangmual Vengthlang Kohhran Biak Inah an innei.

■ **GENERAL CONFERENCE THUREL BAWHZUINA :** KTP General Conference vawi 56-na thurel hetiang hian bawhzui a ni.

1. **YRC Budget theh luh hun ruat**

“Budget kalpui mek, member pakhat zela chhuta kan pek thin hi chhunzawm zel ni rawh se kan ti. Hetiangin -

Aizawl khawpui chhung - ₹ 50/-

District Capital - ₹ 30/-

A dang zawng - ₹ 20/-

tih chu November, 2016 thla ral hmian Bial kaltlanga KTP Office-ah theh luh ni se, kan ti.

2. **YRC leh Hospital Charity pual vawi khat thawhlawm lak khawm hun ruat**

“YRC pualin KTP Inkhawm vawi khat thawhlawm lak khawm ni se”, tih leh “KTP Inkhawm tum khat thawhlawm Synod Hospital Charity pualin lak khawm ni rawh se,” tih chu July, 2016 thla ral hmian Bial kaltlangin KTP Office-ah theh luh ni se, kan ti.

Hengte bakah hian - Presbyterian kalphung inzirtirna, Bial leh Branch chanchinbu enkawltute puala Workshop buatsaih te, Ruihhlo ngaite leh hum sual daite puala ram pum huapa tawngtai rual te, 2017-2018 Kum Puan “Thlen chin atanga hmasawn (Phil. 3:16) te chu bawhzui turin Sub-Committee siam a ni.

■ **KRISTIAN THALAI EDITORIAL BOARD MEMBER THAR RUAT :** Kum 2016-2018 chhunga Kristian Thalai Editorial Board member tur a hnuaia mi ang hian ruat a ni :-

Editor : Pu Lalchhuanliana

Joint Editors : Pu Lalhnehzova

Nl. Lalfamkimi

Pu Lalmuanawma

Dr. David C. Vanlalfakawma

Manager : T. Upa Lalmuanpuia

■ **SYNOD CHOIR DIRECTOR RUAT THAR LEH SEARCH COMMITTEE DIN :** Kum 2016-2018 Synod Choir Director atan Pu K. Lalruatpuia, Committee member ruat a ni a.

Tin, 2016-2018 Synod Choir member tur lo zawng turin Synod Choir Search Committee din a ni bawk.

## SYNOD CHOIR RAWNGBAWLNA

1. **KTP GEN. CONFERENCE 2016:** *KTP General Conference wawi 56-na (March 3-6, 2016) chhungin wawi 7 din chhuahah hla 8 an rem a. CF1 Choir nen tum khat an zai ho bawk.*
2. **MELTHUM BIAK IN:** *March 11, 2016 khan Synod Choir member Tv. Lalrinthanga Sailo (Bass) nupui neihna Melthum Kohhran Biak Inah an zai a, tum 1 dinah hla 1 an rem.*
3. **LUANGMUAL VENGTHLANG BIAK IN:** *March 17, 2016 khan CKTP Committee member Dr. Lalrotluanga leh Rebecca Lalrotluangi te inneihna Luangmual Vengthlang Biak Inah an zai a, wawi 1 dinah hla 1 an rem.*
4. **LUANGMUAL WEST BRANCH:** *March 21, 2016 (Thawhtan) zan khan KTP, Luangmual West Branch-ah Zaipawl Night an hmanpui a, wawi 2 dinah hla 5 an rem.*

### CENTRAL K.T.P. HRUAITUTE, 2016-2018

#### Office Bearers

Leader	:	Rev. Zothansanga	9862669230
Asst. Leader	:	Pu Ngurhmingiana	9436374104
Gen. Secretary	:	Upa Zonunmawia	9436152024
Asst. Secretary	:	Pu P.C. Biakmuanpuia	9436374833
Treasurer	:	Pu Zonunsanga Ralte	9402113038
Fin. Secretary	:	Pu Vanlalpeka	9436153728

#### Committee Members

Tv. Joseph Lalsangzuala	9436152063	Pu Lalchhuanliana	9862364583
Pu K. Lalruatpuia	9862577177	T.Upa Lalrinawma	9436152297
Pu Laihnehzova	8119947974	Pu F. Lalremruata	9862561961
T.Upa H. Ramnunsanga	9436152320	T.Upa Zomuana Ralte	8794722319
Nl. Lalfamkimi	9436365245	Pu P.C. Lalropuia	9863144485
Upa Rosangliana	9612166769	Pu Lalmuanawma	9436196515
Dr. Lalrotluanga	9436153937	T. Upa Ricky Lalrammawia Ralte	9862387308
Dr. David C. Vanlalpakawma	9436156561	Tv. Robert Lalduhzuala	9862368012
T.Upa Lalmuanpuia	9436142398		

#### Ex-Officio Members

Rev. H. Lalrinmawia	-	Synod Moderator
Upa H. Ronghaka	-	Synod Secretary (Sr.)
Rev. B. Sangthanga	-	Executive Secretary, i/c KTP





Khawruhlian Bial KTP Conference & Diamond Jubilee (19–22.2.2016)



Tanhril Bial KTP Work camp – New Sachan



Kolasib Hmarveng Bial KTP – Manikbond



Kantu – Vaivakawn Vengthlang Branch



Postal Regn. no. MZR/81/2015-2017  
RNI No. MIZMIZ/2009/29074



Documentary Team



Synod Choir



CF1 Choir



Printed & Published by Zonunmawia, Synod Office, Mission Veng on behalf of Kristian Thalai Fellowship  
Edited by Lalmuanpuia and printed at Synod Press, Mission Veng, Aizawl, Mizoram , Copies - 40,600